


Ho Beoa ea Lokileng ka Tumelo



SABATHA THAPAMA

Bakeng sa Thuto ea beke ena, Bala:

Ba-Roma 3:19–28.

Temana ea Khopolo:

“Ha ho le joalo, re kholoha hore motho o beoa ea lokileng ka tumelo, kantle ho mesebetsi ea molao” (Ba-Roma 3:28).

Thutong ena re kena sehloohong sa mantlha sa Ba-Roma: ho beoa ea lokileng ka tumelo—‘nete e kholo eo ho feta ‘nete e fe kapa e fe, e tlisiseng Nchafatso ea Boprostanta. ‘Me ho sa natse lipolelo tse hanyetsang, Roma ha e so fotele boemo mabapi ne ntlha ena ea tumelo joalo feela ka selemong sa 1520, ha Mopapa Leo a ntša lengolo la bopapa le ahlolang Martin Luther le lithuto tsa hae. Luther o ile a chesa lengolo leo hobane haeba ho na le thuto e ke keng ea beboloa, e ne e le ea ho beoa ea lokileng ka tumelo, e ntse e le eona le kajeno. Poleloana ka boeona e itšetlehile holim’a molao. Setloli sa molao se tla kapele ho moahloli ‘me o ahloleloa lefu ka lebaka la litlholo tsa hae. Empa ho tla ea nkang sebaka sa setloli e be o mo jarela litlolo tsa hae, ka ho etsa joalo a lokolla setloli. Ka ho amohela ea mo nkelang sebaka, joale o ema kapele ho moahloli, a sa hlakoleloa molato feela empa u nkua a e-so ka ba a etsa litlolo tsa molao tseo a tlileng ka tsona khotla. ‘Me ke hobane ea mo nketseng sebaka—ea nang le tlaleho e hloekileng ka ho phetheha—o fa setloli se tšoaretsoeng ho boloka molao hoa hae ho phethehileng. Leanong la topollo e mong le e mong oa rona ke setloli sa molao. Ea nkelang sebaka, e leng Jesu, o na le tlaleho e phethehilleng, ‘me o ema seabakeng sa rona ka lekhotleng, ho loka ha Hae ho amoheloa seabakeng sa ho se loke ha rona. Kahona re apesoa khanya kapele ho Molimo, ‘me e seng ka lebaka la mesebetsi ea rona empa ka lebaka la Jesu, eo ho loka ha Hae ho fothang ha rona haeba re ho amohela “ka tumelo.” Hona hee ke litaba tse molemo! Hantle-ntlē, litaba li sitoa ho ba molemo ho feta moo.

**Ithute thuto ea beke ena ho lokisetsa Sabatha sa la 28 Mphalane.*

Mesebetsi ea Molao

Bala Ba-Roma 3:19, 20. Pauloseosi o reng moo ka molao, ka seo o se etsang, le ka seo o sa se etseng kapa o ke keng oa se etsa? Hobaneng ho le bohlokoa hore Bakreste bohle ba utloisise ntlha ee?

Pauloseosi o sebelisa lentsoe molao ka moelelo o pharalletseng oo mo-Juda a n'a ka o utloisisa matsatsing a hae. Ka lentsoe Torah (lentsoe la se-Heberu bakeng sa “molao”), le kajeno mo-Juda o nahana ka ho khetholoha ka taelo tsa Molimo libukeng tsa pele tse hlano tsa Moshe empa ka ho pharalla, ka Testamente ea Khale kaofela ha eona. Molao oa boitšoaro—hammoho le pharalatso ea oona litaeong le likomelong, hape le melao ea mahlabelo—e ne e le karolo ea taelo ena. Ka lebaka lena re ka nahana ka molao e le tsela eohle ea bophelo ba se-Juda. Hoba tlas'a molao ho bolela ho ba tlas'a taolo ea oona. Molao, leha ho le joalo, o senola mefokolo ea motho le molato kapel'a Molimo. Molao ha u ka ke oa tlosa molato; seo o ka se etsang ke ho tataisa moetsalibe ho ba tla pheko bakeng sa oona. Ha re sebelisa buka ea Ba-Roma matsatsing a rona, moo molao oa se-Juda o seng o sa sebetse, ha re nahana ka molao re nahana ka molao oa boitšoaro. Molao ona o sitoa ho re pholosa joalo feela ka ha melao ea se-Juda e ne e sitoa ho pholosa ba-Juda. Ho pholosa moetsalibe ha se mosebetsi oa molao oa boitšoaro. Mosebetsi oa oona ke ho senola semelo sa Molimo le ho bontša batho moo ba haelloang ke ho bontša semelo seo. Hore na ke molao o fe—oa boitšoaro, oa mahlabelo, oa likamano, kapa ha e kopane kaofela—poloko ea o mong kapa kaofela ha eona ka bo eona ha e ka ke ea hlhisa motho a lokile kapel'a sefahleho sa Molimo. Hantle-ntle molao o n'o sa rereleo ho etsa seo. Ho fapana le hoo, molao o ne o lokela ho supa mefokolo ea rona 'me o re tataisetse ho Krete. Molao o sitoa ho re pholosa joalo feela ka ha matšoao a bokulo a sitoa ho phekola bokulo boo. Matšoao ha a phokole; a supa bohloki ba pholiso. Ke kamoo molao o sebensang kateng.

U atlehile ha kae boitekong ba hau ba ho boloka molao? Karabo eo ea hau e lokela ho u joetsa eng ka ho se thuse hoa ho leka ho bolokeha ka ho boloka molao?

Ho Loka ha Molimo

“Empa joale ho loka ha Molimo ho hlahile, e seng ka molao, ho ntse ho pakoa ke molao le baporofeta” (Ba-Roma 3:21). Ke joang re ka utloisang se boleloang ke temana ee?

Ho loka hona ho hocha ho fapantšoa le ho loka ha molao, e leng ho loka hoo mo-Juda a neng a ho tloetse. Ho loka hona ho hocha ho bitsoa “ho loka ha Molimo”; ke hore ho loka ho tsoang ho Molimo, ho loka ho fanoang ke Molimo, ‘me ke hona feela hoo a ho amohelang e le ho loka ha ‘nete. Hona, efela e le ho loka hoo Jesu a ho entseng bophelong ba Hae ha a sa le nameng a apere botho—ho loka hoo a ho neang bohle ba ka ho amohelang ka tumelo, ba ka ikopelang hona, e seng hobane ho ba lokela empa hobane ba ho hloka.

“Ho loka ke ho mamela molao. Molao o batla ho loka, ‘me sena moetsalibe o na le molato oa sona ho molao; empa o sitoa ho fana ka hona. Tsela e le ‘ngoe feela eo ka eona a ka fihlelang ho loka ka tumelo. Ka tumelo a ka tlisa makhabane a Kreste ho Molimo, ‘me Morena a behe ho loka ha Mor’a Hae tlalehong ea moetsalibe. Ho loka ha Kreste ho amoheloa sebakeng sa ho hloleha ha motho, e be Molimo o amohela, o tšoarella, le ho bea ea lokileng, moea o bakang, o lumelang, e be o mo nka eka o lokile, a mo rate joalo ka ha a rata Mora oa Hae.”—Ellen G. White, *Selected Messages*, buka ea 1, leq. 367. U ka ithuta ho amohela ‘nete ee e hlollang joang bakeng sa hau? Sheba le Ba-Roma 3:22.

Tumelo ea Jesu Kreste e teng, tumelo e se nang pelaelo ho Jesu Kreste. Ha e sebitsa bophelong ba Mokreste, tumelo e fetisa bohlahe ba kelello haholo; e fetisa kananelo ea litaba tse itseng tsa ‘nete ka bophelo ba Kreste le lefu la Hae. Ho e-na le hoo, tumelo ea ‘nete ho Jesu Kreste ke ho mo amohela e le Mopholosi, Moemeli, Tiisetso ea Tefelo, le Morena. Ke ho khetha tsela ea Hae ea bophelo. Ke ho mo tšepa le hore ka tumelo u batle ho phela ho latela litaelo tsa Hae.

Ka Mohau oa Hae

U ntse u bolokile kelellong ea hau seo re ithutileng sona ho fihlela mona ka molao le seo molao o ke keng oa se etsa, bala Ba-Roma 3:24. Pauloseosi o re'ng moo? Ho bolela'ng hore topollo e ho Jesu?

Ke eng taba ee ea “ho bea ea lokileng,” joalo ka ha e fumaneha temaneng? Lentsoe la se-Gerike dikaioo, le fetoletsoeng ho bolela “ho bea ea lokileng,” le ka bolela “ho lokafatsa,” “ho phatlalatsa a lokile,” kapa “talima a lokile.” Lentsoe leo le ahiloe kutung e tsoanang le dikaiosune, “”ho loka,” le lentsoe dikaioma, “tlhoko e lokileng.” Kahona, ho na le khokahano e kholo pakeng tsa “ho bea ea lokileng” le “ho loka,” khokahano e sa etsahaleng liphetoletong tse ngata. Re beoa ba lokileng ha re “phatlalatsoe hore re lokile” ke Molimo. Pele ho tokafatso ena motho ha a loka ‘me kahona ha a amohela ho Molimo; kamor’a ho beoa ea lokileng o nkoa a lokile ‘me kahona a amohela ho Molimo. Sena se etsahala feela ka mohau oa Molimo. Mohau o bolela ho etsetsoa molemo. Ha moetsalibe a fetohela ho Molimo bakeng sa pholoho, ke ketso ea mohau ho talima kapa ho phatlalatsa motho eo a lokile. Ke molemo o sa lokeloeng, ‘me molumeli o beoa ea lokileng kantle ho makhabane ao e leng a hae, ho se seo a ka se hlhisang ho Molimo lebitsong la hae ntle ho hloka thuso ha hae ho fetisisang. Motho o beoa ea lokileng ka topollo e leng ho Jesu Krete, topollo eo Jesu a fanang ka eona e le moemeli le tiisetso ea tefelo bakeng sa moetsalibe.

Ho beoa ea lokileng ho hlhisoa ho Ba-Roma e le ketso ea nako e itseng; ke hor eho etsahala ka nako e itseng. Ka nako e ‘ngoe moetsalibe o kantle, ha a loka, ha a amohela; motsotso o hlhlamang, o latelang ho beoa ea lokileng, motho o s’a le kahare, a amohetsoe, hape a lokile. Motho ea leng ho Krete o talima ho beoa ea lokileng e le ketso e fetileng, e ileng ea etsahala ha a ne a inehela ka botlalo ho Krete. “Ho beoa ea lokileng” (Ba-Roma 5:1) ho bolela ka kotloloho “ha u se u beiloe ea lokileng.” Ke ‘nete ha moetsalibe ea beuoeng ea lokileng ha a ka kheloha eaba o khutlela ho Krete, ho beoa ea lokileng ho tla etsahala hape. Hape, haeba ho sokoloha hape ho nkuoa e le boiphihlelo ba letsatsi le letsatsi, ho na le moelelo oo ho ka talingoang ho beoa ea lokileng e le boiphihlelo bo iphetang.

Ka litaba tse molemo li le monate ha kaale, ke eng se thibelang batho ho li amohela? Bophelong ba hau, ke lintho tsa mofuta o fe tse u thibellang litšepisong tseo Morena a u batlang ho u fa tsona?

Ho Loka ha Kreste

Ho Ba-Roma 3:25, Pauloseosi o pharalla ho feta ka litaba tse kholo tsa pholoho. O sebelisa lentsoe le manoni, pheko. Lentsoe la teng ka se-Gerike, hilasterion, le hlaha Testamenteng e Ncha feela ho Ba-Heberu 9:5, moo le fetoleloang e le “setulo sa mohau.” Kamoo le sebelisitsoeng ho Ba-Roma 3:25 ho hlalosa mpho ea tokafatso le topolo ka Kreste, pheko e bonahala e emela phethahatso ea sohle se neng se tšoantšoa ke setulo sa mohau ka sehlahalelong sa Testamente ea Khale. Seo taba ena e se bolelang, ha ho le joalo, ke hore ka lefu la Hae la sehlabelo, Jesu o beiloe e le tsela ea pholoho ‘me o hlalisoa e le Eena ea fanang ka pheko. Ka bokhutšoanyane, ho bolela hore Molimo o entse se neng se hlokeha ho re re pholosa. Temana e boela e bua ka “ho lesa libe.” Ke libe tsa rona tse re etsang hore re se ke ra amoheleha ho Molimo. Ha ho seo re ka se etsang e le rona ho hlakola libe tsa rona. Empa morerong oa topollo, Molimo o entse tsela ea hore libe tsena li lebaloe ka tumelo maling a Kreste. Lentsoe bakeng sa “teselo” ka se-Gerike ke paresis, le bolelang ka ho otloloha “ho feta holim’a” kapa “ho feta.” “Ho feta holim’a” ha se ho iphapanyetsa libe. Molimo o ka feta olim’a libe tse fetileng hobane Kreste o se a lefile kotlo bakeng sa libe tsa batho bohle ka lefu la Hae. Kahona, mang le mang, ea nang le “tumelo maling a Hae” libe tsa hae li ka lesoa, hobane Kreste o se a mo shoetse (1 Ba-Kor. 15:3).

Bala Ba-Roma 3:26, 27. Pauloseosi o fetisa ntlha e fe moo?

Litaba tse molemo tseo Pauloseosi a neng a chesehella ho li arolelana le bohle ba neng ba tla mamela e ne e le hore “ho loka ha Hae [ke hore Molimo],” ho teng le hore ho tla ho rona, kantle ho mesebetsi, e seng ka makhabane a rona, empa ka tumelo ho Jesu le ho seo a re etselitseng sona. Ka lebaka la Sefapano sa Golgotha, Molimo o ka phatlalatsa hore batho ba lokile ‘me a ‘ne a ananeloe a a sebelitse ka ho loka mahlong a tlholeho eohle. Satane a ka se supe Molimo ka monoana, hobane leholimo le entse sehlabelo se fetisang ka bophahamo. Satane o ne a nqositse Molimo ka hore o batla ho batho se fetang seo Eena a ikemiselitseng ho fana ka sona. Sefapano se hanyetsa polelo ena.

E ka ‘na eaba Satane, o ne a lebelletse hore Molimo a timetse lefatše kamor’a hore le etse sebe; ho e-na le hoo, o ile a romela Jesu ho le pholosa. Taba ee e re bolella eng ka semelo sa Molimo? Tsebo ea semelo sa Hae e lokela ho ama tsela eo re phelang ka eona joang? Ke eng eo u tlang ho e etsa ka tsela e fapaneng kamor’a lihora tse 24 tse latelang ka kotloloho e le ka lebaka la ho tseba kamoo Molimo a leng kateng?

Kantle ho Mesebetsi ea Molao

“Ha ho le joalo re kholoa hore motho o beoa ea lokileng ka tumelo kantle ho mesebetsi ea molao” (Ba-Roma 3:28). Na see se bolela hore ha re sa hlokoa ho boloka molao leha molao o sa re pholose? Hlalosa karabo ea hau.

Moelelong oa nalane, Pauloeseosi ho Ba-Roma 3:28 Pauloeseosi o ne a bua ka molao ka bophara ba oona moelelong oa mekhoha ea se-Juda. Ho sa natse na mo-Juda o ne a leka ho phela ka hloko ha kae tlasa tsela eo ea bophelo, o ne a sitoa ho beoa ea lokileng haeba a ne a sitoa ho amohela Jesu e le Mesia. Ho Ba-Roma 3:28 Pauloeseosi o phethela polelo ea hae hore molao oa tumelo o beella boithoriso kathoko. Haeba motho a ne a beoa ea lokileng ka liketso tsa hae, a ka ithorisa ha hona. Empa ha a beoa ea lokileng ka hobane Jesu e le lebaka la tumelo ea hae, thorisano e ba ke ea Molimo, ea beileng moetsalibe ho ba ea lokileng. Ellen G. White o fana ka karabo e thahasellisang ho potso ena “Ho beoa ea lokileng ka tumelo ke eng na?” o ile a ngola hore: “Ke mesebetsi oa Molimo ho poqa tlotla ea motho maroleng, e be o etsesa motho se seng matleng a hae ho iketsetsa.”—Ellen G. White, *Testimonies to Ministers and Gospel Workers*, leq. 456.

Mesebetsi ea molao ha e ka ke ea lefela libe tse fetileng. Ho beoa ea lokileng ha ho tle e le moputso. Ho ka fumanoa feela ka ho lumela sehlabelong sa tefelo sa Krete. Ka hona, mesebetsi ea molao ha ho moo e nang le kabelo tabeng ea ho beoa ba lokileng. Ho beoa ea lokileng kantle ho mesebetsi ho bolela ho beoa ea lokileng ho se letho le ka ho rona le ka re fang tokelo ea ho beoa ba lokileng. Empa Bakreste ba bangata ba utloelletse le ho sebelisa temana ena hampe. Ba seo motho a lokelang ho se etsa feela ke ho lumela, feela a khella mesebetsi le kutlo tlase, le eona kutlo ea molao oa boitšoaro. Ka ho etsa joalo, ba balile litaba tsa Pauloeseosi hampe. Bukeng ea Ba-Roma kapa nq’e ‘ngoe, Pauloeseosi o bontša kamoo ho leng bohlokoa haholo ho boloka molao oa boitšoaro. Jesu le Eena o entse joalo, joalo ka ha ho entse Jakobo le Johanne (Matt. 19:17; Ba-Roma 2:13; Jakobo 2:10, 11; Tšen. 14:12). Taba ea Pauloeseosi ke hore, leha poloko ea molao e se tsela e isang ho beoeng ea lokileng ka tumelo, motho ea beoang ea lokileng ka tumelo o ntse a boloka molao oa Molimo, ‘me hantle-ntle, ke eena feela ea ka bolokang molao. Motho ea sa sokolohang ea sa beoang ea lokileng ha a ka ke a phetha molao.

Hobaneng ho le bonolo ho tšoaseha lerabeng la ho nahana hore kahobane molao ha o re pholose, ha rea lokela ho itšoena ka ho o boloka? Na u kil’a leka ho tsetlehela sebe mabaka ka ho beoa ea lokileng ka tumelo? Hobaneng boo e le boemo bo kotsi? Ka nako eona eo, re ne re ka ba kae kantle ho tšepiso ea pholoho, leha re therekella ho e sebelisa hampe?

Mohopolo o Tsoellang:

Bala Ellen G. White, “*The Righteousness of Christ in the Law*,” maq. 236–239; “*Come and Seek and Find*,” maq. 331–335; “*Perfect Obedience Through Christ*,” maq. 373, 374, ho *Selected Messages*, buka ea 1; “*Things New and Old*,” maq. 128, 129, ho *Christ’s Object Lessons*. “Leha molao o ke ke oa lefa kotlo ea sebe, empa o nqosa moetsalibe ka molato oohle oa hae, Kreste o tšepisitse tšoarelo e ngata ho bohle ba bakang, ‘me ba lumela mohau oa Hae. Lerato la Molimo le fanoa ka bongata ho moea o lumelang, o baka. Letšoao la sebe moeeng le ka felisoa feela ka mali a Sehlabele sa tefelo . . . sa Eo ea neng a lekana le Ntate. Mosebetsi oa Kreste—bophelo ba Hae, boikokobetso, lefu, le ho buella motho ea lahlehileng—ho phahamisa molao, le ho o etsa o hlomphehang.”—Ellen G. White, *Selected Messages*, buka ea 1, leq. 371. “Semelo sa Kreste se ema sebakeng sa semelo sa hau, ‘me u ea amoheleha kapele ho Molimo joalo ka ha e ka ha oa ka oa etsa sebe.”—Ellen G. White, *Steps to Christ*, leq. 62. “Ha Moapostola a re re beoa ba lokileng ‘kantle ho mosebetsi ea molao,’ ha a bue ka mosebetsi a tumelo le mohau; hobane ea etsang mosebetsi eo, ha a lumele hoba o beoa ea lokileng ka ho etsa mosebetsi eo. (Ha a etsa mosebetsi e joalo ea tumelo), molumeli o batla ho beoa ea lokileng (ka tumelo). Seo Moapostola a se bolelang ka ‘mosebetsi ea molao’ ke mosebetsi eo ka eona ea itokafatsang a tšepang hore, ha a e etsa, o beoa ea lokileng ‘me kahona o lokile ka lebaka la mosebetsi ea hae. Ka mantsoe a mang, ha a ntse a etsa hantle, ha a batlane le ho loka, empa o batla feela ho ithorisa ka hore o se a fihletse ho loka ka mosebetsi ea hae.”—Martin Luther, *Commentary on Baroma*, leq. 80.

Lipotso tsa Puisano:

1. Bala litemana tsa beke ena e be, ka mantsoe a hau, u ngola serapa se akaretsang seo li se bolelang. Arolelanang ka lirapa tsa lona sehlopheng.
2. Bala qotsulo ea Luther e kaholimo. Hobaneng ha ‘nete e kang ee e ne e ka mo fa cheseho joalo ka ha e entse? Hoabeng seo a ileng a se bolela e le ntlha ea bohlokoa haholo eo re lokelang ho e utloisa molemong oa rona kajeno?
3. “Baleti ba ipona e le majalefa le liahi holima litaba tsa bohlokoa tsa Nchafatso thutong ea Biblele ea ho beoa ea lokileng ka mohau ka tumelo feela, hape e le babuseletsi le babuelli ba botlalo, tlhakiso, le ho tsitsisa evangeli ea baapostola.”—Ivan T. Blazen, “*Salvation*,” *Handbook of Seventh-day Adventist Theology (Hagerstown, Md.: Review and Herald® Publishing Association, 2000)*, p. 307. Re na le mabaka a fe ho lumela hore se ngotsoeng ka rona moo ke ‘nete?’

